

Održana svečana ceremonija puštanja u rad softvera za katastar FBiH

23.07.2013 15:13



Premijer Vlade Federacije Bosne i Hercegovine gospodin Nermin Nikšić je 22.7.2013. godine u Sarajevu tokom svečane ceremonije, koju je organizirala Federalna uprava za geodetske i imovinsko- pravne poslove, pustio u rad jedinstveni softver za održavanje katastarskih podataka Federacije BiH, katastar.ba.

Tom prigodom održana je i internet prezentacija katastarskih podataka za prostor cijele Federacije BiH. Prilikom puštanja u rad softvera za katastar FBiH premijer Nikšić je istaknuo da će novi jedinstveni

softver puno značiti građanima BiH jer će se u budućnosti zemljišni sporovi rješavati brže, a izdavanje dokumenata u svezi sa zemljištem bit će efikasnije, te da se ovim uspjehom stvara povoljniji poslovni ambijent kako za inozemne, tako i za domaće investitore.

U ime Federalne uprave za geodetske i imovinsko-pravne poslove prisutne je pozdravio i govor održao ravnatelj Željko Obradović, koji je naglasio da BiH implementacijom ovog projekta posjeduje daleko najbolje rješenje za održavanje katastra u regionu. Ravnatelj Obradović je pojasnio da je na ovaj način napravljena središnja baza za sve katastarske podatke, odnosno informacije o zemljištu i nekretninama. To su za sada alfanumerički podatci, a do konca godine bit će dostupni i grafički prikazi, čime će ovaj projekt biti kompletiran. Na ovaj način će biti vrlo lako provjeriti sve bitne informacije o nekretninama i njihovim vlasnicima, posjednicima, što će biti od velike koristi investitorima. Ravnatelj je također najavio kako će Uprava u narednom periodu realizirati još nekoliko projekata, među kojima je i usuglašavanje podataka iz katastra sa zemljišnim knjigama, za što će biti potrebno bar pet do sedam godina. U bazi podataka su smješteni podatci za oko 4,5 milijuna parcela.

Pomoćnik ravnatelja Federalne uprave za geodetske i imovinsko-pravne poslove u sektoru za geoinformatiku gospodin Nedžad Pašalić održao je prezentaciju o toku implementacije projekta, te je obrazložio kako je projekt podrazumijevao edukaciju osoblja u katastarskim uredima u općinama FBiH, njihovu tehničku opremljenost te uspostavu jedinstvenog sustava poslovanja, odnosno standardiziranog i jednoobraznog rada općinskih katastarskih ureda u Federaciji Bosne i Hercegovine.

Pomoćnik ravnatelja je također naveo kako će naredne godine biti urađena revizija projekta, te naglasio kako je neophodno osigurati održavanje i unapređivanje ovog značajnog softvera.

Svečanoj ceremoniji su prisustvovali mnogobrojni gosti iz svih razina vlasti Federacije BiH, kao i predstavnici privatnog sektora iz oblasti geodezije i informacionih tehnologija.

Internet prezentaciju katastarskih podataka Federacije BiH možete pogledati [OVDJE](#).

Internet adresa za pristup podacima je: <http://katastar.fgu.com.ba>